



**Inatsisartut aalajangiiffigisassaattut siunnersuutigineqarpoq, Naalackersuisut peqquneqassasut danskit inatsisit attortinneranut ministerianut attaveqassasut Kalaallit Nunaanni Eqqartuussiveqarneq pillugu inatsip allanngortinneqarnissaa pillugu. Allanguut periarfissaqartitsilissaaq hashimik pinerluttoqarsimatillugu aamma allatigut peqqarniitsumik pinerluttoqarsimatillugu, politiit ilisimannittunik illersuinissannut, taamaaliornikkut unnerluussamut taassumallu illersuisuanut ilisimannittup aqqanik kalerriussinngissinnaallutik.**

(Inatsisartunut ilaasortaq Steen Lynge, Atassut)

(Siullermeenera)

Demokraatini nuannaarutigaarput Naalackersuisut Inatsisinik Atortitsinermut Ministereqarfik suleqatigalugu immikkoortumi inatsisit nutarterlugit aallartissimammatigit. Tamanna pisariaqalivissimavoq.

Danmarkimi pinerluttaalisitsinermut inatsimmi § 729 C, imikkoortoqarpoq 1-miik 7-mut, nunatsinili inatsit taamaallaat immikkoortoqarpoq 1-miik 4-mut. Kissaatigaarput immikkoortut 5-miik 7-mut ilanngunneqassasut. Eqqortumik oqaatigalugu. § 729 C periarfissiivoq malittarisassat § 729 a-p aamma 729 b-p saneqqunneqarsinnaanerannut, immikkut innimigisassat tamanna pisariaqartippassuk aamma saneqqussinerup unnerluussap illersorneqarnissaa immikkut eqqarsarnartoqartilinnippagu.

Tassa imaappoq, uppersaasut kinaassusaat isertuussinnaavarput. Immikkut kissaatigaarput periarfissap tamatuma annertusinissaa aamma tamanna atorneqarsinnaalersillugu eqqartuussinermi politiiniinnaanngitsoq, politiit kisiisa periarfissinnagit uppersaasussat kinaassusaannik isertuussinissaannut aammali eqqartuussinerup ingerlanerani taamaaliorsinnaalerluta. Demokraatini nalunngilarput, tamanna ajornarsinnaasoq, isumaqarpugulli pisariaqarluinnartoq.

Peqataanik erseqqissaassutigissuarput nunatsit ittimi, ikittunnguakkuutaanik inoqarfiusumi, unamminarsinnaammat immikkoortortamik pilersitsisoqarnissaa - akuttunngitsumik peqquserluttoqarsimaneranut ussiiniartoqarsimanerannulluunniit misissuisartussamik aamma inuit ikioroornartumut hashimut akiuinnermut atatillugu paasissutissaatillit saaffigisinnaasaannik. Tassa qitisumik immikkoortorta saaffigineqarsinnaasoq aamma pissarsiarigasuarneqarsinnaasoq, najukkami politiinut saaffiginnikkusunngikkaanni.

Nunami Kalaallit Nunaattut ittimi, politiit pinerlussimasut uppersaasullu qanillutik najugaqarfianni aamma immaqa ilisarisimaffianni, isumaqarpunga politiit immikkut



periarfissaqartittariaqarigut paasissutissanut isertuussanut illersuisinnaanissaannut aamma uppersaasussanut pinerlunnerup misissorneqarnerata nalaani, sualummik aanngajaarniutitut tunngasunut, inunnt ulorinartorsiortitsisinnaasunut pinerlunnernut assigisaannullu misissuisoqartillugu.

Soorlu aamma isumaqartugut periarfissaqassasoq pinerlunnernut uppersaajumasut, malersorneqarnissaminnullu ersisut, illersorneqarsinnaasariaqartut.

Aamma taamaattoqarsinnaasariaqarpoq - ernummatiginagu uppersaasut aqqisa avammut tusarliunneqarsinnaanerata, taamaattumik manna oqaluttarfik aqutigalugu Naalackersuisut aperissavakka, nunami maani politiit qanoq iliorsinnaanersut, qularnaarniarlugu nunami maani ikiaroorartulerisut isumannaalluinnarnissaat aamma qanoq akulikitsigisumik sulliviup iluani tamanna misissorneqartarnersoq? Iluarissavarput akissut naqitanngorlugu pisinnaagutsigu, nalunnginnatsigu, Naalackersuisut torrutiinnarlugu apequtigut akisinnaangikkaat.

Demokraatni siunnersuut isumaqatigilluinnarparput allaallu assigumik saqqummiussiumaarluta oqaatiginikuuarpur, takuuk § 37 naapertorlugu apeqquterput ukioq manna normoqartoq 205, tassani Naalackersuisut suliaq taannarpiat pillugu aperaagut. Nuannaarutigaaarpur manna siunnersuut aqutigalugu immikkut iliuuseqartoqarmat aamma neriuppugut nunatsinni inatsisinut atuuttunut ilanngunneqapallakkumaartoq.

Taamatut oqaaseqarluta siunnersuutip akuerineqarnissaa inassutigaaarpur.